

## Projekt „Sportom do zdravlja – SPORT ZA SVE“ ([Sportski savez općine Tešanj](#))



Cilj projekta je ukazati na potrebu bavljenja sportom radi zaštite zdravlja s posebnim akcentom na stvaranju mogućnosti da se sportom bave marginalizirane grupe građana. U martu je povodom Svjetskog dana voda održana konferencija za sve građane na temu: Izrada katastra zagađivača Ze-do kantona sa osvrtom na općinu Tešanj. Predavači na konferenciji su bili: dr.sci Raif Seferagić i dr.sci Mirano Jupić, stručnjaci iz oblasti ekoloških nauka, a prisutnim građanima prezentovali

su činjenice vezane za izradu katastra zagađivača Ze-do kantona uz adekvatna pojašnjenja vezana za problematiku zagađenja okoline i mjerama i radnjama iz kantonalnog ekološkog akcionog plana. Prisutni građani su aktivno učestvovali na konferenciji i od predavača svojim pitanjima tražili dodatne informacije o ekološkim planovima i aktivnostima na zaštiti ekologije.

U aprilu su ribolovci, lovci, sportisti, učenici osnovnih škola i ekološki osvješteni građani iz više nevladinih organizacija realizovali ekološku akciju usmjerenu na čišćenje obala rijeke Usore, jezera Mrkotić, pristupnih puteva, dvorišta škola i drugih institucija i sađenju sadnica "katalpe". U akciji je učestvovao i načelnik općine Tešanj, a zasađeno je 100 sadnica "katalpe" i 20 sadnica "jasena", te je prikupljena znatna količina raznog smeća koja je uredno prevežena do gradske deponije.

Tokom mjeseca aprila 2018. godine, u organizaciji Sportskog saveza općine Tešanj u saradnji sa Stonoteniskim klubom „NEC“ Tešanj, u prostorijama Sportske dvorane u Tešnju održavani su besplatni treninzi stonog tenisa za sve zainteresovane građane općine Tešanj.

Tokom mjeseca maja 2018 godine održani su treninzi gimnastike za sve zainteresovane građane koje provode predstavnici Sportskog udruženja SUT Trepče, te trenažne aktivnosti na polju plesa i plivanja.

Projekat sadrži i aktivnosti na polju edukacije trenera i sportista, te organizaciju centralnog sportskog događaja na kojem će se široj javnosti prezentovati naučena znanja i vještine korisnika projekta.

Po završetku projekta pristupit će se izradi i potpisivanju ugovora o zajedničkom nastupanju i saradnji u daljem periodu između organizacija civilnog društva i jedinica lokalne samouprave sa ciljem stvaranja boljih uslova za djelovanje marginaliziranih grupa društva.

## Projekt “Škola pčelarstva 'Prva košnica’” ([Udruženje pčelara „Pčela“](#))

Kroz ovaj projekat 25 mladih ljudi pohađa teoretsku i praktičnu nastavu iz oblasti pčelarstva. Program uključuje sve oblasti važne za početnike u pčelarstvu.



Upisani polaznici redovni su na predavanjima kao i na praktičnoj obuci na oglednom pčelinjaku koji je također oformljen kroz ovaj projekt. Praktična obuka osmišljena je tako da prati teoretski dio kao i kalendarske obaveze u pčelinjaku te polaznici imaju mogućnost učiti neposredno tokom jednog aktivnog ciklusa u životu pčela od nabavke roja pa do vrcanja prvog meda.

Do juna 2018. godine kroz školu su obrađene sljedeće teme:

- BIOLOGIJA PČELA - razvoj i život pčela, staništa i organizacija pčelinjaka (košnice, vrste i tipovi, pčelarski pribor i alati)
- PČELINJA PAŠA - Medonosno bilje, vrijeme cvjetanja bilja, doprinos pčela razvoju voćarstva - oprašivanje
- TEHNOLOGIJA PČELARENJA
- ULOGA MATICE U PČELINJOJ ZAJEDNICI - (Proizvodnja, selekcija, oplodnja i zamjena matica)
- RAZMNOŽAVANJE PČELINJIH ZAJEDNICA (Prirodno rojenje, nagoni za rojenjem, sprečavanje rojenja, vještačko

razrojavanje, vrsta rojeva

- - PRIPREMA PČELA ZA LJETNU PAŠU - ( Formiranje optimalnog broja pčela radilica za sezonu paše mjere koje pčelar poduzima, mjere koje pčelar poduzima da ojača pčelinju zajednicu)
- RADOVI NA PČELINJAKU U TOKU GODINE - (Temu započeti početkom pčelarske godine nakon posljednjeg vrcanja i priprema za uzimljanje do kraja pčelarske godine)

Svaki polaznik dobio je i "Startni paket" koji predstavlja vezu polaznika škole i oglednog pčelinjaka na kojem on ili ona ima nešto svoje i prati napredak.

Kroz ovaj projekat Udruženje će kroz educiranje mladih pčelara izvršiti podmlađivanje članstva te podržati imidž općine Tešanj kao zdrave prirodne sredine. Pčelarstvo omogućuje vođenje porodičnog biznisa, posebno u ruralnim sredinama, u oazama netaknute prirode, te je očekivani rezultat projekta i samozapošljavanje određenog broja polaznika.